

邕寧縣志卷十三

垠西莫炳奎星五編纂

職官志五

宦績列傳下 附貪酷吏

黃瑞 桂山 楊守隨 盛瀧 蔣山卿 季本 翁萬達 朱黼 霍與瑕 林夢琦 楊寅秋 楊嘉祚 張所望

尹浦 蔡蒙 李津 姚鏞 王守仁 方紀達 吳子堅 余光 郭應聘 林恭章 胡延宴 張惟楨 李華先

王吉士 以上明

李率泰

于時躍

線國安

莽吉圖

慕天顏

黃元驥

趙應魁

趙良璧

孫明忠

孫調鼎 徐吳治

沈近思

甘汝來

黑天池

梁友毅

彭昌集

吳德徵

沈炳垣

朱鑑 劉勳

楊彤壽

蕭憲章

張秉銓

譚鴻翔

彭鑾

紀堪謹

沈世培

（明）

黃瑞。字叔祥。甌寧人。洪武間。以文學授南寧知府。興學勸農。郡民悅服。丁憂歸。父老

籲闕遮留。詔諭服闋仍守南寧。後如詔復任。政聲益著。甌寧縣志

尹浦。字文淵。山陰人。天順間。貢入太學。成化間。授南寧通判。時郡中苦猺患。久方議

發兵。人情洶洶。浦至。單騎入猺洞。呼酋長與語，諸酋相與就公問所由來。浦曰。此行爲爾曹乞生。無他疑。因爲具陳禍福。諸酋感動。顧謂其黨曰何如。皆曰願從使君言。

遂相率羅拜。定約而出。尋督諸軍。討木頭等洞。皆捷。大臣交章薦。擢平樂同知。粵西文載王文成全書

桂山。字本寧。成都人。成化中。歷遷廣西參政。分守左江。時大藤峽猺獞寇南寧亟。山一日馳

至。選士兵據要害以禦之。烽火相望。寇懼遁去。由是蠻畏其威不敢肆。四川通志

蔡蒙、字時仲、吳縣人。成化間。南寧知府。宣化民競渡。誤死被逮。入故殺律。連七人。

蒙得情。盡釋之。田州土知府岑浦。驕悖不法。與其族爭襲。弄兵相攻。蒙目至其地。以理

曉諭。皆感服釋仇。久之。疏乞致仕。宏治癸丑卒。蘇州府志

楊守隨、字維貞、鄞人。成化進士。授御史。按江西。廉知李孜省居鄉不法。收治之。孜省

遁入京。因緣中貴驟用事。益譖毀守隨。遂以應天府丞。降調南寧知府。承勘忠州事。暮夜

有饋金者堅却之。時吏治多污濁。守隨獨元節自奪。罷里甲供饋。禁佐屬勿得擅受訴訟

。懲男女之不以禮婚者。郡俗爲之一變。宏治初。召爲應天府尹。尋謫廣西右參政。久

之。進按察使。屢官至工部尚書。謚康簡。粵西文載。按明史有傳今從文載

李津、字濟之、四會人。宏治進士。以南京刑部郎中。守南寧鄖陽。俱有治績。一統志

盛瀧、字源之、登進士。初知臨淮縣。終南寧守。爲政嚴明。一毫無所染。以直忤當道。解官

歸。行李蕭然。抵家。社門讀書。不入城市。有御史以巡鹽按浙。知其饘粥不繼。延之

入省。飲款甚洽。瀧終無所言。一巨商敗法當戍。攜千金因瀧子以請。子乘間謂曰。父忍兒輩

饑寒以死耶。瀧曰。吾誓不以饑寒易晚節。子悟。還商人金。相與甘心不悔。越中稱清白

吏。必曰盛南寧云。萬歷蕭山縣志

姚鏞、字英之、慈谿人。廣西提督僉事。嘉靖四年。以右都御史。提督兩廣軍務。兼巡撫。

田州土官岑猛叛。鏞調令都指揮沈希儀等。統兵八萬。分道討。而鏞與總兵官朱麒等。攻

破定羅、丹梁。用希儀計。結猛婦翁岑璋。使爲內應。大破之。斬猛子邦彥於工堯隘。璋

誘殺猛獻其首。詔進鏞左都御史。加太子少保。任一子。鏞請設流官。陳善後七事。制可

。乃命參議汪必東。僉事申惠。與參將張經。以兵萬人鎮其地。必東惠移疾他駐。猛黨盧

蘇、王受等。詐言猛不死、借交趾兵二十萬且至。夷民信之。蘇等薄城。經突圍走。城遂陷

。王受亦攻入思恩府。鏞太討之。會廷議起王守仁督兩廣軍。令鏞與同事。鏞引疾乞罷。

許馳驛歸。邕人建東泉書院祀之。後與王守仁合祀敷文書院。府志兼參明史稿

蔣山卿。字子雲。儀真人。潯州知府。時征思田。南寧爲襟喉。官兵四集。饋饟亟劇。調知

南寧。張約束。調轉輸。居民安堵。軍需克濟。及事寧。議設思田爲流府。欲割思龍以附之

。山卿力阻之曰。此割肉補瘡也。是其議。思龍爲隆安縣。遷廣西參政。粵西文載 有南冷集。

四庫全書提要

王守仁。字伯安。餘姚人。嘉靖六年。思恩田州土酋盧蘇王受反。總督姚鏞不能定。乃詔守

仁。以原官兼左都御史。總督兩廣兼巡撫。守仁在道。疏陳用兵之非。且言思恩未設流官

。土酋歲出兵三千。聽官征調。既設流官。我反歲遣兵數千防戍之。是流官之設。無益可

知。且田州鄰交趾。深山絕谷。悉猺獞盤據。必仍設土官。斯可藉其兵力爲屏蔽。若改

土爲流。則邊鄙之患。我自富之。後必有悔。章下兵部。尙書王時中。條其不合者五。帝

令守仁更議。十二月。守仁抵潯州。會巡按御史石金。定計招撫。悉散遺諸軍。留水順保

靖土兵數千。解甲休息。蘇受初求撫不得。聞守仁至益懼。至是則大喜。守仁赴南寧。二人遣使乞降。守仁令詣軍門。二人竊議曰。王公素多詐。恐給我。陳兵入見。守仁數二人罪。杖而釋之。親人營撫其衆七萬。奏聞於朝。陳用兵十善。招撫十善。因請復設流官知府。帝皆從之。斷藤峽猺賊。上連八寨。下通僊臺花相諸洞蠻。盤亘三百餘里。郡邑罹害者數十年。守仁欲討之。故留南寧。罷湖廣兵。示不再用。俟賊不備。進破牛腸六寺等十餘寨峽。賊悉平遂循橫石江而下。攻克仙臺、花相、白石、古陶、羅鳳、諸賊。令布政使林富。率蘇受兵。直抵八寨。破石門。副將沈希儀。邀斬軼賊。盡平入寨。明史王守仁傳

季本、字德明、山陰人。弱冠舉於鄉。連遭父母喪。不入內寢。家居十三年。窮研載籍。聞王守仁良知之訓。乃悔其舊所學。登止德進士第。授御史。以言事謫揭陽主簿。守仁方督兩廣。建敷文書院於南寧。日聚幕僚及諸生講學。因聘本爲師。且爲教令云。原任監察御史季本。久抱濫故知新之學。素有成己成物之心。即今見在軍門。相應委以師資之任。南寧守令。其速具禮。率領府縣學師生。詣書院受業。務在興起聖賢之學。一洗習染之陋。本在邕數載。闡明正學。率以良知揭糞於人。邕士浸漬具教。所成就甚衆。遷長沙知府。講學嶽麓。一如敷文書院時。陳大章、莆田人。明習三禮。守仁亦聘之學宮。爲講明冠婚喪祭諸儀。且諭諸生云。安上治民莫善於禮。冠婚喪祭諸儀。今皆廢而不講。欲求風俗之美。其道無由。諸生類多束書高閣。嬉遊散漫。若使與陳君朝夕講習。於儀文節度之間。亦足以收其放心。固其肌膚。束其筋骸。不猶愈於博奕之爲賢乎。由是諸生觀感。莫不奮起。人人爭以禮相磨濯。蓋守仁之教也。據清一統志及王文成公全書修

方紀達、字行可、歙縣人。嘉靖八年。遷廣西僉事。既至。值田甯用兵之後。出謀發慮。動

合機宜。如思恩之徙治荒田。思龍之不割附田州。皆有力焉。加意撫恤。民賴以生。及卒。無以爲殮。僚屬合贈收之。府志

翁萬達、字仁夫、揭陽人。嘉靖五年進士。授戶部主事。再遷郎中。出爲梧州知府。咸寧侯仇鸞鎮兩廣。縱部卒爲虐。萬達縛其尤橫者杖之。閱四年。聲績大著。會朝議將討安南。擢萬達廣西副使。專辦安南事。達請於總督張經曰。莫登庸大言中國不能正土官弒逆罪。安能問我。今憑祥州土舍李寰。弒其士官珍。思恩土目盧回。煽九司亂。龍州土舍趙楷。殺從子燧煖。又結田州人韋應。殺燧弟寶。斷藤峽猺侯公丁負固。此曹同惡共濟。一旦約爲內應。我且不自保。先禽此數人問罪。安南易下耳。經曰然。惟君之所爲。於是誅寰應。禽回。招還九司。誘殺楷。佯繫訟公丁者。給公丁執諸坐。以兩廣軍破平其巢。又議割四峒屬南寧。降祠豪黃賢相。登庸始懼。遷浙江右參政。經以征安南非萬達不可。奏留之。乃命以參政蒞廣西。已而毛伯溫集兵進剿。萬達上書伯溫。言揖讓而告成功。上策也。懾之以不敢不從。中策也。芟夷絕滅。終爲下策。伯溫然之。會獲安南謀者丁南傑。萬達解其縛。厚遇遣之去。怵以天朝兵威。登庸大懼。乃詣伯溫乞降。是役也。萬達功最。賞不逾常格。然帝知其能。遷四川按察使。明史翁萬達傳

吳子堅、潮陽人。嘉靖十七年。爲宣化教諭。每升堂諭學。首嚴義利之辨。嘗植松於東西齋。日夕自灌。以種樹爲種心。授學者以勿忘勿助之法。遷慶遠教授。去任。邕士建植松亭。鑄石以識去思。郝洽通志

朱黼、吉水人。先任南京監察御史。激揚風厲。嘉靖二十年。知南寧府。爲政多持大體。興學右文。振作士氣。郡邑中有弊政不便於民者。悉釐革之。至今民猶不諼。府志

余光、字緝之、贛縣人。嘉靖鄉薦。授涪州。遷廣安州。以明廉著聲。未幾升南寧同知。益自刻勵。土官承襲分例盡卻之。會討安南。毛伯溫為帥。嘗召人幕府。計事多采用。已而安南降奪國號。貶為都統司。功狀上以與有勞。擢南京刑部員外郎。光緒江西通志

霍與瑕、字勉齋、南海人。尚書韜子。隆慶六年。為廣西按察僉事。飭兵左江。土酋黃金彪背逆。督撫方議進討。與瑕翦其羽翼。一矢不遺。縛致之。亂遂定。廣西通志以四都叛復不常。

致南太二府。道路阻絕。奏請於朝。析宣化如禾鄉地。建新寧州治。粵西文載

郭應聘、字君賓、莆田人。嘉靖進士。授戶部主事。以不附嚴嵩。出為南寧知府。多惠政。

用治行第一。薦授兵備副使。隆慶中。晉廣西布政使。忠州土目黃賢相。與思明蠻爭地。

應聘密授兵備譚惟鼎。計禽賢相。及代。殷正茂為巡撫。奏以忠州四都地。建新寧州。以

終前功。後拜兵部尚書。引疾歸。卒謚襄靖。邕人祠祀之。府志。按明史有傳今從府志

林夢琦、晉江人。萬曆四十六年。守南寧。時當大荒。甫下車。問民疾苦。發倉振濟。是歲

秋遂大熟。民得不病。性鯁介。不畏豪蠹。恤鰥寡。課士養民。以援黔功。遷左江道。士

民外祠。與胡廷宴並祀。府志

林恭章、字爾肅、莆田人。萬曆中。歷宮潯寧平明四府。交趾通貢稅。例歸按察司。恭章於

關外。大書誓不受交趾一物。福建通志

楊寅秋、字義叔、江西泰和人。萬曆中。遷廣西副使。擊叛獠韋公成等。定五山。又擊叛猺

黃朝田等。定府江。先是交趾黎莫構誑。貢道久絕。延議剿之。總督陳大科。以屬寅秋。

寅秋竊計曰。不拒黎。亦不棄莫。吾策定矣。遂獨主綏輯。黎果來款。左江鳴吠不驚。邑

人相率祠報之。後以疾卒。撫按交疏請卹。其畧云。交南析華之勳。方之銅柱。府江破竹之烈。過於金城。詔贈太僕卿。李紱有臨臬集。四庫全書提要。按見明史安南傳今徒李志

胡廷宴。漳浦人。進士。萬歷間。為廣西副使。分巡左江。甫下車。即練兵整伍。黜汙崇良

。風紀大肅。左江賴以寧謐。士民建祠尸祝。府志

楊嘉祚。字寨雲。泰和人。萬歷進士。知揚州。以台臣交薦。遷副使。備兵左江。交南負固

。嘉祚馳檄責讓。黎氏歛關請服。方諭功。奄黨崔呈秀。以宿憾未已。奪職去。光緒江西通志

張惟楨。字兆甫。江夏人。萬歷庚子舉人。以郎中。出知南寧府。軫恤災荒有法。擢雲南按

察副使。湖北通志

張所望。字叔翹。上海人。萬歷辛丑進士。備兵蒼梧。轉參政。移治左江。左江遷隆峒長官

黃兆基。愛少子。而殺長子鎮隆。鎮隆有遺孤嘉祚當立。吏目黃文舉、挾鎮西爭襲。仇殺

累年。所望率兵討平之。將吏請郡縣其地。邀延世賞。所望曰。師來定亂。柰何斬人祀以

自利。乃誅文舉立嘉祚而還。口不言功。圖書集成引松江府志

李華先、字允熙、蒼梧人。少有孝行。以貢授南寧訓導。士之俊又者。爭來就學。成就者甚

衆。同治蒼梧縣志

王吉士、字鳳翥、四川安岳人。崇禎丙子舉人。永曆七年。知南甯府。府當兵燹。遺黎凋瘵

。吉士巡行鄉邑。拊循安輯。盡蠲積逋。免庫役。救難民至數千人。亂後。牛幾絕。吉士

散俸錢千金。買之他所。牛乃孳息。縣北銅鼓江。故有陂塘。初自宋司戶孔宗旦。歲久傾

圯。吉士循故迹復築之。雖凶歲不爲害。子遺始獲蘇息。邑人祀之孔中允祠。據明舉人顏全仁王公遺愛碑修

案官績自有可紀之實。馬史班書。義例具在。蜀郡之慕文翁。南陽之思召父。非可以薦考成語得之者。府志名宦列傳。以有明一代爲最無依據。不曰廉能勤慎。即曰吏畏民懷。牽類案牘陳言。何關實錄。年湮事晦。廢墜難蒐。存之既有乖史裁。削之則循良弗曜。今但取前志所遺。標名分註篇末。以示有筆無削之意云爾。

附府志名宦十二人

方圓。金華人、洪武間知南寧府、政尙尙恕、勤於庶字、民甚德之、以才堪治繁、調泉州府、郡人不忍其去、陳鼎。字廷器、青田人、監生、正統間、知南甯、興利除弊、吏畏民懷、輿論咸服其

能、劉芳。字永錫、廣東陽江人、宏治間、由進士任南寧守、愛民禮士、革弊除奸、治有循聲、致政歸、民思慕之、羅嵩。通城人、宏治間、知宣化縣、邑素疲劇、歷令尤尠整頓、嵩蒞政臨民

、卓有矩度、民李雍。福建晉江人、進士、正德間知南寧府、律身以勤慎、林珍。順德人、舉人、正德八年帖服而德之、廉潔、爲政以寬平安靜、民懷其德、遷廣東參政、任宣化知縣、爲政有方

、愛民如子、聽訟斷決、悉李景元。侯官人、進士、嘉靖元年、知南寧、吳世寶。翁源人、嘉政七年以理法、民皆懾服無冤焉、興學造士、惠政及民、士民感德焉、知宣化、簡重端

怒、廉明仁惠、其政聲洋溢遠邇、行喻義。字宜之、無錫人、進士、嘉靖十二年、守南寧、廉以自待、誠待取授寺丞、人以爲銓宰之有衡鑒、以物、臨政公明、剖決無滯、仁恕均施、三致政。闔郡懷思、

孫寬。晉江人、嘉靖間、任南寧府訓導、簡簡重端方、振林昭。廣東人、監生、嘉靖十五年、子南寧教興有道、士子益知向學、其於分華勢利泊如也、授、誠謹自持、教士子敦本崇實、一時

士風歸盧定。莆田人、監生、嘉靖十五年、任南寧訓導、性和平、學淵博、正、勤於教士、隨其質困誘之、寒暑不輟、惟恐其不能成也、

（清）

李率泰。遼東人。順治十年。總督兩廣。李定國陷廣西。諸郡縣急。攻新會。率泰躬提勁卒大破之。定國宵遁。進駐邕城。畧定左右江。郡邑平靖。兩藩將士。欲乘亂掠高雷潯南。

率泰偵知。馳令禁遏。人素憚其威而止。大清統一志

于時躍 奉天廣寧人。順治十年。巡撫廣西。時朱由榔尙盤踞雲貴。南太六郡。則李定國據

焉。時躍籌畫兵餉。督師進討六郡。救撰盛京通志

線國安、字爲山。奉天人。頭治七年。從定藩右翼總兵。征廣西。下桂林。入柳州。進逼南寧

。充先鋒。功最。遂鎮守南寧。九年。李定國陷桂城。提師赴桂。定國聞之。走衡州。十

年定國復犯桂。與巡撫陳維新計敗之。十七年。討雲南大捷。晉伯爵。在鎮二十年。不擾

民間絲粒。及卒。赴吊者數千人。府志國安鎮南寧。秉性廉介。二十餘年。清操如一。人

咸以爲難。救撰盛京通志

莽吉圖。滿洲人。康熙中。以鎮南將軍。率師渡嶺。克復南雄。還復韶州。明將張星耀。不

戰而竄。所至秋毫無犯。康熙十二年。抵南寧。擊賊帥吳世琮於五象嶺。盡殲其衆。軍威

益振。以疾卒於軍。百姓肖像祀之於望仙坡五公祠。更名六公祠。府志

慕天顏、陝西靜寧人。順治乙未進士。康熙五年。任南寧同知。甫蒞任。值土寇蹂躪地方。

設策勦除。民賴安枕。所屬及鄉捐設義學。延師訓迪。月給膏火。修陽明書院。并購院旁

屋。爲士子肄業所。歲歉。捐資設法賑撫。遠近均沾。民無菜色。時盜風肆熾。練民爲伍

。使鄉保守望相助。申明賞罰。以鼓勵之。盜風遂息。擢興化郡守。歷陞漕運總督。府志

黃元驥、字德臣。福建晉江人。康熙十九年。任廣西按察使。會大兵由廣西進復雲南。將軍

賴塔。素知元驥前守南昌時。猝應軍糈才。移書總督金光祖。檄以轉餉。即兼程趨南寧。

是時土州縣多險阻延望。元驥宣布威德。開誠化導。率響應。建議就地募夫充運。諸內郡

民。得免侵冒瘴癘遠役之苦。又爲圜轉遞運法。自竹洲塘。直接滇省。計里設塘。計塘設汛。分設目長。逐塘遞接。更番休息。先至者別出賞以旌之。前後運糧數百萬。日用夫六千六百人。增口糧。給禦寒止舍之具。人心踴躍。叢出疊嶺間。輓役不勞。而餉饋日充。師歌騰飽。以致凱捷。元驥實總其役也。康熙二十二年。遷任山東布政。雍正十一年。巡撫金錕。題祀名宦。府志

趙應魁。字觀吾、商邱人。康熙間。授袁臨鎮總兵。吳三桂亂湖南。與耿精忠合縱。夾逼江西。且遺書招之。應魁斬其使。以兵塞袁臨之阨。閩楚卒不得合。兩藩坐是敗。應魁力也。

。從諸君進定廣西。破吳世琮南寧。以功鎮左江。民獲安堵。清一統志

趙良璧。字連城、盛京開原人。康熙八年。知徐溝縣。邑當孔道。民苦供億。良璧送迎餽獻胥絕。不以絲毫累民。以清源溢案窪誤去。民爲立生祠以祀。敕撰盛京通志二十二年。知南寧府。三藩亂後。民不樂其生。良璧極意撫卹。蠲除煩苛。與民更始。日坐堂皇治事。民得直前自白。不尙威嚴。亦不拘以文法。縣中稱其廉平。縣故擅水利。亂久悉廢。迺築龍門永安二渠。爲士民先。前後修起坡塘十餘處。比歲大獲。盜賊屏迹。寢寢忘其亂矣。復立寅賓館。寬置田產。貧土應舉者。歲取其贏。以資舟車。賓興由是日盛。自良璧爲之始云。視事六年。計最。擢寧台道。

孫明忠。字省齋。漢軍正紅旗人。康熙三十一年。以廕授邕守。性簡靜尤加意庠序之教。捐俸修復學宮。建兩學齊舍。以館學者。絃誦復興。俸滿。遷惠潮道。士民建孫公講院祀之。縣人劉章爲之記。其後十年。孫調鼎繼爲知府。設四鄉義學。以惠寒士。擢建昌道去。

又十年。徐吳治爲宣化縣。患士人囿於所習。爲文藝多輕剽浮靡。吳治誘以經史。務求根抵爲先。且多刊大家文集。俾之誦習。文風爲一振。陞大理同知。士民竝鑄石紀其事。調

鼎漢軍正白旗人。吳治。字蓼巖、石門人。已上並據府志修

沈近思、字位山、錢塘人。康熙進士。五十二年。以臨穎知縣。特簡南寧同知。近思故篤好程朱之學。居官一以其鄉陸隴其爲法。能以儒術飭吏治。倅邕日。力行保甲。盜賊屏迹。

(浙江通志)南寧山險多盜、近思力行保甲、嚴督緝捕、期年寧謐、未二年。引疾歸。雍正間復起。官終左都御史。謚端恪。有天

鑒堂文集。大清一統志、朝先正事畧、國

甘汝來、字耕道、號遜齋。江西奉新人。康熙進士。授涑水知縣。以拘繫侍衛畢里克。受知聖祖。當是時汝來以強項令名聞天下。雍正二年。備兵左江。故事。諸土州縣。於道府有所餽遺。多出自科歛。汝來獨却之。禁誡僚屬。毋得有染。諸土官莫不憚其清嚴。寧明州興安南祿州地。犬牙相錯。山深易藪奸。爲申定斥堠。邊境以寧。累官廣西巡撫。吏兵二部尚書。謚莊恪。有遜齋全集。宦績紀略等書。初汝來任太平知府。爲巡撫李紱所重。紱上言南寧一府。與太平唇齒相依。接連高廉瀕海之地。水陸交會。形勢重於太平。鹽徒山盜。出沒其間。控制兩江州縣尤多。武官設有左江鎮總兵。文官設有左江道。兼轄潯南太三府。今左江巡道乏員。請以汝來陞補。汝來前革陋規。士民悅服。才守爲九府之冠。左江得人。而廣西南境。可藉以撫綏矣。又南寧知府慕國典。姦貪。經已參革。臣所灼知者。有義寧縣知縣黑天池。才守亦不亞汝來。目前惟此二人。足當保舉。奏上。世宗即超擢天池知南寧府。補汝來巡道。卒稱循吏。紱舉不失賢。汝來、天池、不負所舉。與世宗之

不次用人。可見當時吏治之隆焉。

清一統志 國朝先正
事畧 雍正硃批諭旨

梁友穀、字赤若、襄陽人。乾隆乙卯舉人。補江西崇義知縣。有惠政。改廣西。歷靈川宣化二縣。內地民與南人爭金銀廠。聚眾械鬥。友穀往諭平之。以母憂歸。湖北通志

吳德徵、字宣三、江西金谿人。舉人。咸豐三年。觀察左江。時盜賊縱橫。滿城荆棘。無餉可措。無兵可籌。事至無可爲之時。惟撫和民衆。日與公正紳耆。籌劃剿賊方略。卒能恢復城池。保安守土。強梁之徒。俱皆翦滅。孑遺之民。託庇安集。故論者謂自咸同以來。武功吏治。爲地方官首屈一指。語詳前事中。

彭昌集、字厚初、巴縣人。咸豐四年知縣事。昌集資性明敏。有吏才。宣化故繁劇。值盜賊四起。軍馬倥傯。昌集措置裕如。廣西昭
忠錄土賊林一昌、起縣西。踞玳瑁墟。寇鈔武緣、隆

安、各縣。昌集率練勇往剿。獲一昌。族誅之。五年四月。吳凌雲匪目雷大把搗、曾十大

、竄宣化亭子墟。昌集一鼓擒之。堂匪
總錄六年。調蒼梧。死艇匪之難。平桂
紀畧

沈炳垣。字紫卿。浙江海鹽人。咸豐五年。督學廣西。時各府多以警聞。試事不能如期。七年春。始按試南寧。試畢。賊報日急。官民洶洶。咸思走避。炳垣倡言於官紳。謂南寧城險人衆可守。苟富者挾資走。如窮百姓何。願與諸君共死於此。又條列守禦法。傳諭各團局。甚備。守土者以炳垣在不能去。力趣之行。炳垣行二日。而南寧城陷矣。論者方幸炳垣之不死於南甯也。已而竟死於梧州。事聞。贈侍郎。謚文節。朱鑑，大興人。巡檢橫州大灘司。咸豐七年。土賊李七。梁大口昌。犯橫州。鑑戰敗。被拘舟中。乘間自經。賊覺。更邏守之。重其爲人。欲脅以降。鑑求死不得。及陷南寧。躍投水中。時方漲急。賊持救已

漂沒矣。劉勳、字子友、山西洪洞人。從楚軍平山澤孫仁廣。敘功。補府經歷。同治五年

督餉過流仁洞。舟覆溺死。廣西昭忠錄 縣人謝煌沈文節公傳案 右三人非守土吏而與縣事有關姑綴於此

楊彤壽、字麓生、長沙人。同治七年知縣。巡撫凱嵩。方督兵邕州。征土寇。善後事。一以委之。彤壽才識開敏。區處悉就條理。尤長於折獄。有二人以爭金煙管就質者。彤壽審視曰。美哉金也。自吸之。亦各令二人吸之。因斥其僞者曰。止。得之矣。彼自有金管。吸時若將傷焉。愛護惟恐不至。吾初視其管。無所損。汝乃抵地者三。以耗其金。自有金管者。果如是乎。僞者大駭服。觀者數百人。皆稱爲神君。人有初婚不憚於其妻。愬之縣。彤壽召之來。謂愬者曰。此所謂綽約處子也。大有福相。吾爲若賀矣。用夫人輿送之歸。其後和好無他。其息事甯人。多此類也。凡有訟事。不輕受理。受則隨理隨結。無沉滯者。每按事。人必傾城往觀。庭無坐立處。按畢。必問於衆曰。允乎。衆曰允矣。即訟者亦無言。始令退出。訟用是日希。

張秉銓。字幼奕。候官人。光緒四年知縣。以謹厚廉惠爲治。五年正月。郡城有土匪之警。有莫揚者。上書請爲備。且言防兵通寇狀。兵備使者。以防營已所統。曲意迴護。將坐莫揚搖惑論斬。秉銓獨緩其事。既而驗防兵。果有亂跡。遣出城。而調城外兵入守。嚴閉城門。捕誅內應者十餘人。而事定。而莫揚得毋誅。且獲獎焉。語在兵事志中。事後。兵備欲多誅殺。以張己功。秉銓執不可。李氏兄弟。以附寇就逮。殺其兄。釋弟不問。他所平反者猶多。日坐堂皇。聽訟响响作家人語。既得其情。即呼兩造前令相對。釋忿去。庭無鞭撲聲。秉銓以邕雖米鄉。而積貯缺焉。乃勸建常平義倉。紳民感其廉蕙。捐輸恐後。不二年。建倉至數十廩。積穀至數百萬。手訂義倉章程。爲經久計。士民遵守。至今不替云。

。調臨桂。去之日。士民爲築張公去思亭於望仙坡下。

蕭憲章、字子斌、奉天復州人。光緒四年。以進士宰武緣。治盜有聲。邕武毗境。多大山。盜藪其中。爲兩邑害。憲章習知賊情。陰設方略。以白大府。請不急推其芟藪。亂且滋。大府以其才足辦賊。十一。移宣化。許以便宜。憲章任縣役健幹者爲爪牙吏。使督賊盜。蕭阿壽、凌阿的者、城西巨盜也。橫行城外。趨捷善避捕。嘗以日中盜兵器。刃擬營弁而奪之金。弁莫敢誰何。憲章跡之確。一舉殛之。闐肆肅然。縣東盜以百數。四塘麻大、六塘高平三，爲渠率。時往來邕武境上。恣寇鈔。捕急。則倚山自固。憲章密布兵練。塞四塘諸山。而自領幹役疾掩之。得高平三。兵練亦得其從賊十餘人。惟麻大跳而免。跡者至龍州而得之。悉置於法。其西南路諸盜。亦以次就捕。前後擊殺凡數十百人。無不當罪者。境內稱爲小康。憲章無疾言遽色。而治盜尙嚴。奸民畏之。號老蕭。且爲之語曰。寧逢虎叫。無逢老蕭之笑。虎叫猶可。老蕭笑榜我。其威嚴如此。然亦不純任法術。每課士。必手自丹黃。爲諸生評隲文藝。娓娓數千言。各得當其意而去。高材生必召入官舍。與論古今。禮遇備焉。俸滿。權知歸順直隸州。

彭鑾、字瑟軒、江西寧都直隸州人。光緒十三年由內閣侍讀。特簡南寧知府。旋移思恩。十六年復本任。永淳大水。即割俸馳賑。捐米數萬斛。分區散濟。買竹篷數百張。災民得棲止。至忘其災。二十一年。轄境大旱。預令紳富借墊四萬金。運米平糶。米源旣旺。價大貶。又兼濟龍州軍食。所屬需米。無不立應者。明年。議開商埠。鑾力爭主權。坐失上官旨。解官。即怡然就道。曰。吾不肯爲南寧罪人。雖以此失官。亦始願之所及也。賦詩爲別。上官旋鑒其直。明年今復任。二十四年夏六月。鬱林有土匪之變。不五日。陸川北流

博白興業容縣皆陷。橫貴城門書閉。鑾與鎮道議。以邕爲近邊重鎮。而邕爲之門戶在橫貴。先調重兵扼之。遏賊使不得西。昕夕籌戰守。厚軍實。賊知有備。不敢西上。邊軍得順流破賊。列城皆復。時鑾年七十餘矣。九月。以病卒於官。鑾爲彭士望裔。績學能文。有易堂諸子風。其官內閣也。歷充國史方略。會典各館提調。最明習掌故。左宗棠稱之曰。彭君風流儒雅人也。守邕十年。視官如家。好爲詩歌。日與士人飲酒賦詩爲樂。巡撫馬丕瑤察吏少許可。獨雅重鑾。贈句云。惻惻無華真漢吏。文章有美古邕州。其品概可知也。然性近懦。久於其任。土匪已潛滋。充耳不聞。卒官後。即蠱起。無異釀成。論者以此少之。

譯鴻翔。字禮存。順德人。光緒乙未巡檢三官堡。欽廉大水。流民就食三官。鴻翔多方籌賑。痛懲奸民之滋事者。米價既平。流民以次散歸。一堡寧貼。

沈世培、字幼嵐。湖南善化人。光緒二十七年。以舉人知縣事。蠹吏倪七者。前官多倚爲姦利。勢橫甚。世培至。立懲之。遠近稱快。陳村人以爭路久鬪。官莫能制。世培爲剖析利害。皆感悅。願釋仇和好如初。同治間。北鄉銅鼓陂決。鄉人爭據水利。鬪且訟。垂三十年。世培驗古碑。斷歸蘇盧二姓修復。乃詳於大府解其訟。隨訂約十二章。鑿諸石。北鄉至今蒙其利。

紀堪謹。字子怡。直隸獻縣人。光緒三十年。柳州降賊陸阿發。據城叛。總督岑春煊督師進剿。堪謹以知府參軍。叙功補柳州守。三十三年。備兵左江。大亂甫平。朝廷責郡縣興學甚急。守土吏多虛應故事。茶靡不自振。堪謹至。始銳意規畫。爲改泐模範小學。師範學堂。開圖書轉運局。立教育會。女子小學。大減省官中用度。捐俸錢。買房舍。歲收所

入。以餽師儒之久於職任者。在邕五載。日召宮紳。躬自飭厲。學制爲一新。凡所規制。務爲經久。不苟簡目前。其勑模範小學也。修起學舍。至五十楹。容生徒至二千人。規模闊遠。甲於列縣云。縣中高材生。至今學於京師。及泰東西大學專門能有成就者。多模範弟子也。

貪酷列傳

李蒙

蔡京已上唐

蕭注

俞儋已上宋

左君弼已上明

慕國珮 沈元佐 黃之孝

黃輔相

袁寶璐已上清

(唐)

李蒙。咸通初。邕管經畧使。時南詔陷交趾。邊事日急。廣容桂三道。共發兵三千人。戍邕州。三年一代。經畧使段文楚。請以三道衣糧。自募土軍以代之。朝廷許之。所募纔得五百人。文楚入爲金吾將軍。蒙代爲經畧。利其闕額衣糧以自人。悉罷遺三道戍卒。止以所募兵守左右江。比舊什減七八。故蠻人乘虛入寇。會蒙病死。經畧使李弘源。至鎮纔十日。無兵以禦之。城遂陷。人咸詬蒙昏貪召寇云。唐書南蠻傳

蔡京、咸通三年。西道節度使。

(宋王讜唐語林)邕州蔡大夫京者、滑臺人、以淮士稍遷撫州刺史、及假節邕交道、經湖口零陵、鄭太守史與京同年、以酒樂相遲、坐瓊枝者、鄭君之所愛、

京燭尊之、鄭與之競、邕交所爲如此、爲德義者見鄙、纔到邕南、制與失律、伏法、性貪鄙多詐。嘗以左庶子。制置嶺南事。稱旨。連遷西

道節度使。時南詔逼安南。都護蔡襲。令諸道兵以守。京忌之。恐其立功。乃奏言南蠻遠遁。邊徼無虞。武夫邀功。妄占戍兵。虛費餽運。請罷戍兵。各還本道。詔如其請。襲力爭留五千人備緩急。不聽。乃作十必死狀申中書。時相小之省。而京爲政苛慘。設炮烙之刑。闔境怨之。遂爲軍士所逐。奔藤州。詐爲敕書。及攻討使印。募旁縣土軍以攻邕州。兵敗。往依桂州。桂州人怨其分裂不納。京無所自容。敕貶崖州司戶。不肯赴。還至零陵。詔賜自盡。明年癸未正月。南詔冉陷交趾。襲終以兵少力戰死。通鑑

（宋）

蕭注、字臨江、新喻人。舉進士。攝廣州番禺令。以破儂智高功。知邕州。居邕數年。陰以利啗廣源羣蠻。疏陳交趾可取狀。願馳至京師面陳方略。未報。而甲洞申紹泰。犯西平。五將被害。諫官論注不法致寇。罷爲荆南鈐轄提點刑獄。李師中又劾其沮威嗜利。略智高闔民爲奴。發洞丁。采黃金。無帳籍可考。中使按驗有實。貶泰州團練副使。節宋史本傳

俞儋、紹興間知邕州。有賊。爲憲副呂源所彈。事連經畧胡舜陟。按實並落職。宋史胡舜陟傳

（明）

左君弼、廬山人。洪武二年。以指揮僉事。平上思州之亂。轉南寧衛指揮。五年。宣化盜起。劫南寧府。詔發官軍討平之。初君弼覈民之無籍者爲軍。又縱所部入山伐木。民多擾。

遂相構爲盜。至是討平。命大都府按君弼罪。明史土司傳

（清）

慕國典、陝西寧靖人。雍正二年。守南寧。以前守沈元佐、黃之孝。並以捐穀案敗。先是康熙五十三年。巡撫陳元龍。奏請於桂柳梧邕四府。開捐倉穀。爲數一百十七萬八千二百五十石。捐納時。每石折銀一兩一錢。及發州縣買貯。止給穀價三錢五分。建倉五分。而穀價常在四錢以上。即豐年亦不能買補。率以價銀遞相交代。其後部文倉穀必須本色。州縣計無所出。則移庫銀添人穀價。而數十州縣。無不虧欠賠累者。雖前後撫臣勒還本色。而十年之中。倉穀猶短九萬餘石。雍正二年。巡撫李紱。露章以聞。世宗大怒。令紱澈追。且令陳元龍赴桂清理。其管捐藩司陞任福建巡撫黃國材。臬司王沛懌。南寧知府慕國典。沈元佐。黃之孝。柳州知府趙世勳。梧州知府李之孝。桂林同知吳元臣。趙承壽等。或在省。或改官他省。並革職聽勘。詔許諸臣能吐實情。即照大赦前免其科罪。旋由李紱審明原捐穀一百十七萬八千二百五十石。每折銀一兩一錢。收銀一百二十九萬六千零七十五兩。每石止發給州縣穀價三錢五分。建倉五分。實銷銀四十七萬一千三百兩。其外八十二萬四千七百七十五兩。皆督撫司道府廳私分入己之數。雍正二年十二月二十六日、李紱奏言每石價一兩一錢、發止給四錢、其餘七錢、皆諸臣私分入己、總督一

錢、巡撫一錢、藩司一錢、臬司道員共一錢、管轄府廳二錢、部費一錢、

並勒限分償有差。是爲廣西捐穀之案。國典久任廣西。向與

元佐、之孝、三人。專司捐穀事例。人各贓私數萬。而國典性尤貪黷。其攝新甯州印也。

以置辦執事科派。致人民執票鼓譟於庭。陳監生以官事勒銀至六百兩。下雷土官。按時下雷隸南寧

許乾毓承襲。出結。勒銀至二百二十兩。其他稱是。巡撫紱到任。即特疏題參論如律。

雍正硃批諭旨、東華錄、國朝正事畧、

黃輔相、貴州貴筑人。道光乙巳進士。咸豐元年。以橫州鎮安破賊功。補南甯知府。攝左江

道。時會匪四起。負郭居民團練衛城池。間有通匪者。輔相不問本來。按誅之。即良團亦不免。日論囚輒數十人。又縱勇目潘七。橫行城市。市人以目。土賊吳長腰四。謝起發。因民之憤。藉口報復。輔相不能制。賊大掠城外沙街。火光燭天。康熙以來百八十年。精華盡矣。輔相性剛暴嗜殺。嘗有句云。此番重試殺人手。上慰宵衣旰食心。可知其爲人矣。

轉右江道。兵敗於武宣。仰樂自殺。

節廣西昭忠錄
參平桂紀畧

袁寶璐、江甯人。光緒二十一年。縣大旱飢。郡守鑾已報災。万連米散賑。而寶璐以捐納爲知縣。催科獨急。並索十年以上舊逋。儒生李東樞。請援例蠲免。寶璐將利舊賦入己。欲以成籍人。坐東樞沮格公事。東樞年七十餘。詞氣益慷慨。且曰。方今民無宿糧。途有餓殍。救災恤民。惟恐不贍。明府亦獨何心。至縱虎狼以噬人。今年新賦寬假之不足明府亦獨何心。至索舊逋以益己。明府爲一官計。獨不爲數十萬生靈計乎。寶璐。惡其言觸己。收而榜之。東樞竟瘐死獄中。又縱其弟寶琪。多方勒索。飛灑_田戶。至數十里起。往往爲之破家。